

昌欲自知盛衰觀道可者神靈可與也內有  
壽證候之以此萬不失一也此廼神書也還  
年之期其道至重何可不思故傳之仁賢明  
試使行之以自命是其人應當並出賢知並  
來神書並至奇方自出皆令歡喜即其人也  
以此為効不如此言或但先見非可得行也  
當道後來道不妄出也實有可之但問其人  
今使自思道之可歸亦不可禁亦不可使聽  
其可之觀其成功道不可空雖然夫才不如  
力力不如為而不息也夫天下之事皆以試  
敗天地神靈皆試人故人亦象天道而相試  
也得見善者其命已善矣其見惡者命已疑  
矣自古到今不至誠動天名為強求或亦遂  
得之強求不得真非其有也安可強取其事  
以不和良乖忤錯亂人命有三品歸道於野  
付能用者不能用者付於京師投於都市慎  
無閉絕後世無子傳書聖賢及與道士無主  
無名付能用者道自有可之不可各人可附  
言語猶若大木歸山水流歸海不可禁止也  
天性使然順之者昌逆之者敗亡神書欲出

亦不可閉藏得其人必自揚不得其人暗鑿  
盲身則不悅目中無光精讀此策文樂也夫  
中央昌延命之期數皆在此中也太平之氣  
皆已見焉民慈愛謹良皆以出焉賢聖明者  
皆已悅焉殊方奇文皆已付焉勉行無懈以  
自輔焉明王聖主皆以昌焉夷狄却降皆以  
去焉萬民幸甚皆以無言天壽已行不復自  
寬老以命去少者遂全書傳萬世無絕子孫  
相傳日以相教名為真文萬世無易令人吉  
焉道以畢就便成自然有祿自到無敢辭焉  
大人得之以平國中士得之為良臣小人得  
之以脫身  
右通道意是非之策文

太平經卷之五十五

卷五十五至六十四原缺

太平經卷之六十五六十六

傳三

斷金兵法第九十九

六方真人純等謹再拜白欲有所問天法不  
敢卒道唯皇天師假其門戶使得容言乎道  
之勿有所疑也唯唯今惟天師廼為帝王解  
先人流災承負下制作可以與人君而悉除  
天下之災怪變不祥之屬今愚生欲助天太  
陽之氣使透明帝王日盛姦猾滅絕惡人不  
得行盜賊斷亡妖孽自藏不復發揚豈可聞  
乎善哉六子之問也天使諸真人言諾君子  
已遂無憂小人妖臣不敢作矣其勝已出災  
自滅息矣今為諸弟子具陳天格法使不失  
錄分自隨而記之唯唯然天法垂象上古聖  
人常象之不敢違離也故常厭不祥斷狡猾  
使妖臣不得作者皆由乘天法而為之欲使  
陽氣日興火大明不知衰時者但急絕由金  
氣勿使其王也金氣斷則木氣得王火氣大  
明無衰時也何謂也然人君當急絕兵兵者  
金類也故當急絕之故也今反時時王者賜  
人臣以刀兵金類也聖帝王賜之王者王

之名為金王金玉則厭木而衰火金玉則令甲乙木行無氣木斷乙氣則火不明木王則土不得生火不明則土氣日興地氣數動有祿祥故當急絕滅云兵類多賜金物兵類以厭絕不祥此也天厭固與神無異願聞金與厭木何故反使火衰也善哉子之難問可謂入道矣真人欲樂知其大效是故春從興金兵則賊傷甲乙木行令天青帝不悅天亦帝大怒丙丁巳午不順欲報父母之怨令使火行多災怪變生不祥秋害茲猶其法反使火治憤憤雲亂不可乎大咎在此也善哉善哉願聞何故必多秋民臣狡猾盜賊乎為真人重說使子察察知之天之格法父母見賊者子當報怨天報怨之家必聚不祥偶使狡猾少年能為無道者延能報怨為反逆也是故從賜金兵厭傷木也火治不可平也此者天常格法也不可以故人也六真人以吾言不信但急斷金兵敢有持者悉有重罪即時火災滅除其治立平天下莫不言善哉所以然者火起稱人君故其變怪最劇也其四行不

能也子欲重知其明效五星熒惑為變最劇也此明效也其四星不能子慎吾書吾文天法不失銖分唯唯行為六子重明陳天之法故金氣都滅絕斷絕木氣得大土下厭土位黃氣不得起故春木王土死也故惟春則天激絕金氣於戌故木得遂興火氣則明日盛則金氣凶猶人斷絕金凶則水氣休陰不敢害陽則生下慎無災變木氣王無金則得興用事則土氣死生民臣忠謹且信不敢為非也是天之格法券書也天地之常性常行子知之耶唯唯行子已知矣今復為六子重明天法使口口今天下從兵金氣也又王者或以歲始賜刀兵或四面巡狩止居反賜金兵王者王也以金兵賜人名為王金金玉則水相金玉則害木水相則害火西北陰也東南陽也少陰得王太陰得相也名為二氣俱得勝其陽其災生下狡猾為非陰氣動則多妄言而生盜賊是天格法也六子知之耶唯唯然六真人已知之矣慎天法唯唯今願請問東南陽也何故為地戶今西北陰也反為天

門然門戶者延天地氣所以初生凡物所出入也是故東南極陽也極陽而生陰故東南為地戶也西北者為極陰陰極生陽故為天門真人欲知其效若初九起甲子初六起於甲午此之謂也故天道比若循環周者復反始何有解已其王者得用事其微氣復隨而起矣善哉善哉復為六真人具陳一事王者大興兵則使木行大驚駭無氣則土得王起土得王則金大相金大相則使兵革數動乾兌之氣作西北夷狄猶盜賊數起是者自然法也天地神靈不能禁止也故當務由厭斷金物無令得興行也善哉善哉見師說天法知其可畏矣子知畏之則吉矣今皇天明師幸哀其愚蔽不達於道延具為明陳天法今是獨為一君生耶天下之為法悉如此耶哉然天以是為常格法雖然木行火行無妄從興金獄使錢得數王盜行以為大害使治難平也反使金氣得大土為害甚甚能應吾天法斷之者立吉矣治與秋臣絕天法不欺人也願聞天以此為格法意訣然詳哉六子問

事也然天地以東方為少陽君之始生也故日出東方以南方為太陽太陽君也故離為日日為君南方火也火為君南方為夏夏最四時養長懷姓盛興處也其為德最大故為君也以此為格法雖然音為角者并於東方位為火者并於南方今太平氣盛至天當興陽氣故吾見六真人問事知為天使之故吾為六真人具說所以興太陽君之行法真人慎之唯唯

王者賜下法第一百

○今天師辛亥為惡生陳天法悉具願復問一事今帝王見群臣下及民人天法為人父母見其臣是王者賢子也故助王者治理天地也民者是王者居家不肖子也為王者主脩田野治生見之會當有可以賜之者不賜則恩愛不下加民臣今赤子無所誦道當奈何哉善哉真人之言也然見賢者賜以文見飢者賜以食見寒者賜以衣見賢者何故賜之以文乎所以賜以文者文者生於東明於南故天文生東北故書出東北而天見其象虎

有文家在寅龍有文家在辰負而上天離為文章在南行故三九為文日最大明故文者生於東盛於南故日出於東盛於南方天命帝王當象天為法故當賜文以興太陽火之行也日興火能分別觀文是與非文亦所以記天下是非也善哉善哉行六真人已知天道大覺矣今皇天明師為天具道法既無可暗願聞賜之當以何文哉詳乎六子為天間事也然當如此凡事常苦不口口然樂象天法而疾得太平者但拘上古中古下古之真道文書取其中大善者集之以為天經以賜與眾賢使分別各去誦讀之今思其古今要意為化民臣之大義當奈何因以各養其性安其身如此者大賢儒莫不悅喜也而無惡意各得惟念天地之法知之則今使人上尊愛其君還惜其軀深知明君重難得其中大賢仁者常恐其君老分別為索殊方異方還付其帝王故當賜以道書文善哉善哉子已知之矣今或自易賜之以兵革金物歸反各思利事而上導武氣化流小愚民則使利

事生而兵與金玉狡猾作盜賊起金用事賊傷木行而亂火氣是自然格法子知之耶唯唯願問何不賜之以他文經書然他書非正道文使賢儒迷速無益政事非養其性經書則得淺賢儒日誦之故不可與之也然同可拘上古聖經善者中古聖經善者下古聖經善者以為文以賜之但恐非養性之道使人不自重而反為文也然凡文善者皆可以賜之使其誦習象之化為善也善哉善哉六子已覺之矣

興衰由人訣第一百

○今天師幸都為惡生言願問賜飢者以食寒者以衣意然夫飢者思食寒者思衣得此心結念其帝王矣至老不忘也思自効盡力不敢有二心也恩愛洽著民間如有所得奇異殊方善道文不敢匿也悉思付歸其君使其老壽是故當以此賜之也此名為周窮救急夫賢者好文飢者好食寒者好衣為人君賜其臣子務當各得其所欲則天下厭服矣善哉善哉是以天性上道德而下刑罰故東方

為道南方為德道者主生故物悉生於東方德者主養故物悉養於南方天之格法凡物悉歸道德故萬物都出生東南而上行也天地四方六陽氣俱與生物於辰巳也子知之耶唯唯天之法下刑故西北少陰太陰為刑禍刑禍者主傷主殺故物傷老衰於西而死於北天氣戰閭六陰無陽物皆伏藏於內穴中畏刑興禍不敢出見天道惡之下之故其畜生悉食惡業也是故古者聖人觀天法明故尚真道善德奇文而下武也是明効也今刑禍武生於西北而尚之名為以陰乘陽以賤乘貴多出戰閭今民臣不忠無益王治其政難乎真人寧知之耶唯唯子可謂以覺矣是故古者聖賢常尚道德文常投於上善處而兵革戰備投於下處一人獨居則投文於林上而兵居林下如是則夷狄自降盜賊日消滅矣善哉善哉行子可謂已知之矣六子詳思吾書意以付上道德之君以示眾賢吾之言不負天地賢明也行去辭小竟也事他所疑延復來問之唯唯今六真人受天師嚴

教謹歸各居閑處思念天師言俱有不解唯天師示訣之言行何等也今天延自有四時之氣地自有五行之位其王相休囚廢自有時今但人興用之也安能延使其生氣而王相更相尅賊乎吐吐噫六子雖日學無益也反更大愚哈類無知之人何哉夫天地之為法萬物興衰反隨人故凡人所共與事所貴用其物悉王生氣人所休廢悉衰而囚故人所興事者即成人君長師也人所爭用物悉賈而無平也人所休廢物悉賤而無賈直也是故天下人所興用者王自生氣不必當須四時五行氣也故天法凡人興衰延萬物興衰貴賤一由人是故古者聖人知天格法不可妄犯也故上古時人深知天尊道用道興行道時道王中古廢不行即道休囚不見貴也中古興用德則德王下古廢至德即德復休囚也故人興用文則文王興用武則武王興用金錢則金錢王興用財貨財貨王天下人所興用悉王自生氣其所共廢而不用者悉由凡物何必延當須天四時五行王延王

哉子學何不日昭昭而反日益冥冥無知手真人用意高如此夫俗人共犯天禁言其不然故是也今以子說之人愚獨久矣若真人言中類吾為天陳法為德君解承負先王流災將有誤人不可用者耶如誤何可棄用手六子若有疑欲知吾道大效知其真真與不今疾上付賢明道德之君使其按用之立與天地延響相應是其人明效證驗也今真人尚延不能深知是人能使物興衰進退俗人比於子冥冥與盲何異哉今見天師分別為愚生說之已解矣有過不也夫人既學也當務思惟其要意勿但習言也而知其意訣是天地興道所怨也又學者精之慎之唯唯行去記此天政事可以履精扶勿使德君失政事文也唯唯

太平經卷之六十五